

# 永樂大典

卷〇八〇九一 城字

卷〇八〇九二 城字

卷〇八〇九三 城字

卷〇八一六四 程字

卷〇八一六五 程字

永樂大典卷之八千九十一

十九庚

城

南昌府城

南昌府圖經志本府舊城漢灌嬰所築周十昌門曰四步闢六門城外浚壕儲水晉大康中太守郭十門

闢二門合爲八門唐初修築西南隅元和中太守韋丹修築東北隅增廣周二十一里餘闢門十六宋興城制如舊其門之名曰遵道俗稱宮步曰惠民俗稱寺步曰廣潤俗稱橋步曰德遂俗稱井步曰章江古稱昌門曰惠濟俗稱倉步曰利涉俗稱觀步曰洪喬俗稱大市曰廣恩曰北郭十門皆瀕江曰望雲俗稱新城曰崇和俗稱壇頭曰延慶俗稱琉璃曰望仙俗稱撫州曰故豐曰廣豐六門皆平陸紹興六年故相李綱來帥以城北巖壅江沙遂橫截東北隅入三里其廣恩北郭故豐廣豐西門廢止存十二門元因其俗稱

國朝以城址逼江迺相地利改築堅固崇廣如式周以深壕壕上植柳其宮步井步倉步觀步大市五門今革其撫州門改曰進賢寺步門改曰惠民

橋步門。改曰廣潤。新城門。改曰德勝。壇頭門。改曰永和。琉璃門。改曰順化。章江門。仍舊名。門上各起層樓。沿城創蓋戰樓。粉飾壁壘。完備屹然。江右大藩矣。豫章志雷次宗豫章記云。郡城漢灌嬰所築。有六門。南二門。一曰南門。一曰松陽門。西二門。一曰臯門。一曰昌門。是孫伯符遣虞仲翔來與華府君相語處。東北各一門。以東北爲名。晉太康中。太守范甯更開東之北爲東北門。以對臯門。又開北之西爲西北門。以對松陽門。合八門也。豫章續志按南昌古圖經。府城東北角久壞。元和四年。太守韋丹修築。仍置敵樓於其上。其東門樓久亦頽毀。又改建東南敵樓。正元十四年。觀察李巽闢而新之。號避暑樓。遇夏宴休于此。其廣豐北郭。永泰。故豐四門皆廢。楊傑詩云。故豐門近子真家。樓上高吟冰齒牙。帆似馬來思杜牧。劍爲龍去憶張華。溝運故道穿城角。沙漲平川壓水涯。江外西山衝落日。幾重蒼翠襯餘霞。遵道門。俗曰宮步。有紫極宮在門內。惠民門。俗曰寺步。以門對龍興寺也。或曰運米惠民倉自此入。舊志紹興二十年。閩帥張澄復開廣潤門。俗曰橋步。亦曰柴步。德遂門。傳曰井步。旁有大古井。章江門。古曰昌門。孫策遣虞翻與華歆交語。即此地也。舊圖經云。滕王閣在西。古昌門北。下臨章江。有渡口曰宗華。自是走高安。徐師川嘗有章江晚望詩云。水面

無波千里鏡。日斜倒影一溪紅。漁舟不動鳥飛急。淡淡碧煙蘋末風。惠濟門。俗曰倉步。以對大市。利涉門。俗曰觀步。以近宗華觀。洪喬門。俗曰大市。古圖經謂近洪崖先生藥市。故名。或曰非也。門外有石頭渡。正謂殷洪喬投書處。望雲門。北望神京。故曰望雲。舊有此門。李帥岡移築於此。俗曰新城門。崇和門。俗曰壇頭門。有黃紫庭壇井。號東壇。延慶門。俗曰琉璃。晉人有耕於東湖側。獲琉璃佛像。詔立寺以奉之。今延慶寺是也。故名。望仙門。俗曰撫州門。蓋自是走臨川也。古今志云。徐孺子墓。在今直南門外南昌尉廨之側。南門。即望仙門。撫有望仙鄉。故以名。子城。亦詳見職方乘。唐垂拱間。都督李景嘉復脩。高一丈八尺。周二里二百四十步。中爲大街。直達于東西二門。俗呼東西華門。蓋猶習李氏之舊稱也。其南則府之所治。僅居其半。其北今之親兵營與倖僚等廳也。南雖有樓。而門故塞不啓。涂廡古今志云。今之子城門闕。是觀察使李吳所建。南昌古圖誌云。舊止東西門。李吳改爲雙門。創樓置鼓角焉。又吳興記云。豫章土闕高則長沙虎食人。今豫章子城門亦不開。嘗一開之。虎輒入城。後屢開復塞者數矣。宋朝以來。東西二門。淳化五年。知州陳象輿所作。熙寧二年。太守元積中所修。建炎已酉。盡火於兵。紹興中。三樓相繼興起。然竟置鼓角刻漏於西門。而

南門則直廢而不扉殆猶承前之虎異也。以理推之似或不然。長沙多虎何預豫章利害而輒爲之塞門。豈理也哉。蓋門直設廳之前。樓峙南堞之上。而納章貢二水。旁絕筠撫諸河。洶湧浩蕩。悉匯于樓下。而北注之彭蠡。西山之山。東湖之湖。間見層出。環擁競秀。實形勢之勝也。意者不敢直啓以當之。此所以廢而不扉歟。西門樓。勝以鎮南軍。趙鼎帥立。上有鼓角。及刻漏制作甚精。按杜牧作池州刻漏記。其略云。牧太和三年佐吏部沈傳師江西府。假日公與賓吏環城。見銅壺銀箭。律如古法。曰建中時嗣曹王阜命處士王易簡爲之也。處士精大演數。與雜機巧。識地有泉。鑿必涌起。韓文公嘗與之遊。以此知豫章銅漏之法。有所自矣。東門樓。勝以隆興都督之府。鄧杲帥立。樓本元積中作。曾舍人鞏有記。南昌樓。俗名南樓。左望大江。下臨閶闔。煙汀鳬渚。瞭然在目。真一郡勝槩。涂廩古今志今之子城門闕。是觀察使李巽所建。儀門是觀察使楊憑所修。第二重城。是乾道中江西賊徐唐荅寨基。外羅城。是鍾令公景福二年所築。郡牆東南有雙門。吳五鳳二年。太守淮陽張俊子彥所造。二闕相去十二丈。圖經云。豫章城久荒廢。自唐初修築。西南隅四分之一。即今之州治也。凡八門。其額皆曾楷公徐浩書。集異記。洪州城自馬援置立。後不復修葺。相傳云。修者必

死。唐永泰中。都督張鎬修之不疑。於城西北隅遇一大坎。中有二蛇。頭類牛。形如巨甕。長六十餘丈。小蛇不可勝數。鎬命以竹篾牽之。隨牽而出。入徐孺亭下放生池中。水深數丈。龜魚皆走出水死。後七日鎬薨。判官鄭從南昌令馬皎相繼而卒。宋會要政和七年六月十五日。詔洪州在江南。禹一都會。訪聞外城門。啓閉無時。深慮鍵閉不嚴。透漏私商姦細。浸久生患。仰本州常切指揮兵官。遇夜分詣逐門檢視封鎖飛申。間遣曹掾官覆視。稍有違慢。守門人等並行決配。當職官銜替。蔡九峯。集南昌城。魏城十八里。雄壯稱洪都。北郭勢迤邐。南浦形縈紆。連亘控西江。囊括盡東湖。灌侯遺故址。李相規舊模。改築龍沙堤。三方第如初。得非彫殘後。民力不足歟。得非府庫竭。費用不給歟。當時廟堂上。不主公議歟。我來客城闌。感槩成欷歔。今古如一轍。有才能遠圖。趙蕃淳熙隆興城外作風動雲昏月。槽鳴鷗避船。秋清生既夕。客意怯幽眠。滯爾江行駛。病余人事牽。府公仍仲舉。白屋定誰賢。呂南公灌園集豫章城西山東下古池隄。增飾依佈問晚唐。平世但嚴民筦鑰。亂時曾是賊金湯。春歸舊蝶多芳草。鳥聚荒陴正夕陽。也欲登臨賦風物。自憐才筆厭憂傷。翁卷詩春日登南昌城獨立高城四望低。望中無物不堪題。欲知春事幾深淺。芳草青青猶未齊。

元伍良臣中流集洪城有感 赤幟先登鼓角哀。塞空兵氣黯塵埃。臂鷹壯士乘駝去。逐兔少年騎虎來。山壘西風連草樹。薇垣夜雨長莓苔。最憐相國高昌老。零落臨川骨已灰。孺子亭臯湖湧波。重腫城關樹駢羅。當時霸業人何在。千古高風道不磨。畫閣虛無秋宴少。戍樓依約夕陽多。閒情盡付東流水。獨立蒼茫聞棹歌。史南唐李煜自建鄧徙都洪州。一目重腫。滕王閣已廢。城上周遭皆作戍樓。

## 都尉故城

豫章續志都尉故城在南昌縣南三里。

## 劉繇城

豫章志劉繇城在南昌縣東北三十五里。

吳志云。繇爲揚州刺史。畏袁術不敢之州。乃治曲阿。興平元年。爲孫策所攻。繇奔丹徒。遂沂江南保豫章。駐彭澤。策先至豫章。殺太守朱皓。入居郡中。繇招合屬縣。攻破融。融敗走入山。爲民所殺。繇尋病死。於郡。此城蓋當時所築。城壘甚堅。至今猶存。號爲劉繇城。

## 余城

豫章

志余城。涂廡志云。在建昌縣南湖井村。余孝項。字希託。梁時侯景別將于慶入豫章。進攻新吳。孝項起義兵拒之。因築此城。後爲大尉王僧辨所擢。官至陳蔡二州牧。方輿記云。在新吳縣西十五里。周回三里餘。

## 椒丘城

豫章志椒丘城在郡北下流一百四十里。鄺元云。贛

水又經椒丘城下。建安中。孫策所築。豫章記云。劉勲建安四年。爲孫策所破。於潯陽欲謀取豫章。太守華歆築此城。江表傳云。孫策在椒丘。遣虞翻說華歆。即其地也。

## 孫奮城

豫章志。孫奮城。在郡東北二里。奮爲齊王都武昌。諸葛恪執政。不欲諸王處江濱。徙奮南昌。蓋

居於此。鄺元云。潯水東北逕王步。步側有城。云是孫奮爲齊王鎮此。此城之渚。今謂之王步。蓋齊王之渚步也。郡之東南二十餘里。又有一城。號曰齊城。二城築道相通。蓋其離宮也。

## 齊城

太平寰宇記。齊城。在洪州東陸路二十里。又按輿地志云。吳大帝太元二年立孫奮以爲

齊王都武昌。豫章志云。孫奮孫權第五子也。

## 昌邑城

輿地記。勝昌邑城。在洪州北一百三十里。雷次宗豫章記云。昌邑王

賀封海昏侯。就國築城於此。今舟楫經從建昌界上。有所謂昌邑山。

## 豐城縣城

豐水志。子城。周回一里二百步。高二

丈。闊一丈二尺。濠闊五丈。深一丈。環郭六門。東正信。西折桂。南劔池。天寶北通江。望仙縣在章水之東。羅阜前峙。長江後映。洲渚橫陳。文流縈帶。城外池濠環繞。俗號腰帶水。後人欲便往來。縣之西北湮池爲路。風水爲之隔絕。淳祐乙巳。劉宰卿月采陰陽家之說。鑿路通濠。架橋其上。始復舊制。

豫章續志城有二門。南門揭縣額。北門榜曰登要。

### 黃金城

豫章續志黃金城。富城縣故基也。在縣西二十里長豐鄉。今遺

址具存。本漢建安中置。

### 始豐城

豫章續志始豐城。基在豐城縣南七十里。

### 吳城

豫章志吳城。在豐城縣西

南三十里。云孫鍾種瓜之地。鍾即孫權祖也。

### 黃牛城

豫章續志黃牛城。在進賢縣南五里。父老相傳。以爲黃帝戰蚩尤時

駐於此。舊於其地中得箭鏃。今故基尚存。

### 奉新縣城

豫章續志奉新縣有古城。隋張文憲所築也。又有今城。唐劉正

一所築也。按隋大業十年。詔天下州縣皆築城。縣有漢所築舊城。險不可守。縣令張文憲乃脩城居焉。今地名故縣是已。在今縣西三十里。城之規

畫髣髴猶存焉。唐神龍三年。縣丞高良弼又以阻險。民不安居。議遷縣于馮水之北。長慶三年。縣令劉正一率邑人修城以居。其高闊不滿尋丈。其

東有溝。其西有溪。南北二門抵鎮。遏營。城周五里五十步。東西三里五十步。南北二里。

### 太史城

太平寰宇記太史城。在奉

新縣西四十里。後漢末。太史慈創置。周迴三里。西南有城角山。東南有盤山。北枕江水。其地險固。其址尚存。豫章志太史慈城。涂廩云。在建昌縣西

三里。漢末建安八年。荊州刺史劉表從子磐。數寇艾。西安諸縣。孫策經畧江淮。分海昏等六縣。以太史慈爲建昌都尉。築此城。并督諸將以拒磐。孫權統事。以慈能制磐。委以南方之事。後卒於海昏。方輿記云。在新吳縣西四十里。周回三里。基址尚存。

## 越王山城

元一統志。越王山城。在奉新縣西五十里。按陳寅真常觀記載。道士鄒大皎語。以爲春秋越王勾踐伐楚。屯兵于此。城堞猶存。又有齊雲峯。鳳凰池。枇杷峯。趙越場。青草塘。點軍坪。龍鬚洞。雷公塘。走馬峯。英游石。僊臺石。

## 分寧縣城

豫章志。分寧縣城。周回四百八

## 古艾城

太平寰宇記。古艾城。後漢劉陵。豫章艾縣人是。此地陵爲侍中。車駕出祠南郊。上并輦欲卧。陵跪曰。陛下爲萬

乘主。升車不正立。雖早欲寢。不當上爲天地靈所鑒。下爲萬姓所觀耶。上有愧色。曰。敬受侍中之言。人爲立祠。元一統志。古艾城。在分寧縣西一百里。查田市之下龍岡坪。春秋魯哀公二十年。吳公子慶忌出居于艾。杜預註。豫章有艾縣。自漢至宋齊梁陳。皆有艾。隋開皇九年。省入建昌。

## 西平縣故城

豫章志。西平縣故城。圖經云。在分寧縣西一百九十七里。後漢書鄧通西平人。即此地也。故分

永樂大典卷八千九十一  
寧縣有通宅基存焉。又云在分寧縣三百里。唐武德五年置。貞光三年廢。開城六年再置。開寶二年復廢。**西安故城**續豫章志祥符圖

志西安故城在分寧縣西二十里。**武寧縣城**續豫章志祥符圖經云武寧縣城周

漢建安中置縣。隋開皇九年廢。回一里一百二十步。基廣二尋。高二仞。唐天寶四年縣令范建殊。**靖安縣城**豫章志靖安縣城周回二里。靖安志

職方乘載。縣**建昌府城**建昌府圖經志城舊制原闊九里三十步。前元多圯壞不治。士辰兵興守者屢

修之。辛丑歸附

天朝。時河南行中書省平章王溥守建昌。因兵燹之後。以西北地勢卑。遂收入向裏就高處改築。周圍重新加高。結砌堅壯。完固。粉牆箭樓。鋪舍吊橋。俱各完備。東南帶河。西北繚以濠池。今城上有八里餘。洪武元年。指揮耿顯忠守建昌。以東西南北四門城樓差小。將欲改創而斥大之。於是申聞朝廷。欽奉

聖旨。於東西南北四門。重新改創。城樓各一所。復增築甕城樓三座。宏壯高大。又過於前矣。城東之門舊有三門。一曰天酒門。一曰盱江門。一曰合江門。

天酒門。正大東門也。今改曰武勝門。以通往來。餘皆塞。城西之門舊有二門。一曰紅泉門。一曰青輝門。紅泉門正大西門也。今改曰儀鳳門。以通往來。餘皆塞。城南之門舊有四門。一曰迎僊門。一曰膏露門。一曰太平門。一曰安濟門。迎僊門正大南門也。今改曰通會。以通往來。餘皆塞。城北之門舊有一門。曰朝天門。今改曰朝京門。江前志在易。王公設險。以守其國。而諸侯城隅之制。亦著於禮經。然失其時制。則春秋譏之。以此見聖人慎土工。重民力也。建昌軍自西漢潁陰侯灌嬰立。南城縣未有城壁。至唐僖宗。乾符中。汝南公鎮撫此地。有功。遷南康太守。臨行。召諸將指畫規摹。均其版築。肇建羅城。周四一十三里。闊一丈六尺。高二丈。露屋一千一百三十七間。敵樓三十二所。東西鑿八門。南北二門。門則通衢焉。本朝開寶二年。僞唐昇南城縣爲建武軍。命圉苑副使李崇贍充營屯兵馬監押。攝本軍制置公事。興初。廨舍遷造軍營。崇贍於羅城內增築制院城。一百六十丈。制城門樓四所。總十有二間。各高三丈三尺。東曰來遠門。取其通建饒泉南之路也。西曰永豐。南曰祈仙。北曰朝天。又造鼓樓高三丈五尺。縣廨計以間者七十。郡治倍焉。門之東西立資用鎧戟二庫。城之南北列指揮兵卒四營。緣以周墻三百五十丈。省倉軍糧倉五百楹。臨江迎賓館二。酒

坊。河市。廂虞。候院各一。又建浮橋于盱水之上。越八年。王師平江南。改建武爲建昌。始命牧守。城郭井邑。悉仍舊貫。景德元年。詔下少府。以金鉦一所。戰十技來賜。農桑戶口。日以滋殖。慶曆七年。郡守虞部張頌更浮橋。遷集賓亭。作迴車院。修郡治之公廳。築土方五丈。架梁三十有五尺。次年。郡守太常博士吳某又改作儀門。以及內寢。郡廨棟宇。於是大備。元豐間。郡武有廖恩之變。太守鄭公瑛以舊城隳圯。無以備不虞。奏乞修築。朝嘉其請。給勅詰二道。鬻于郡。乃收納粟之資。鳩工度材。萬杵雷動。不日告成。甃以磚石。翦東岸水圯之地。闢西隅棄壇之所。周迴九里三十步。雉堞樓櫓。爲之一新。時制適中。廣狹得宜。堅固峭壁。爲江西郭壘之冠。民至于今賴之。其餘城池。凡古跡之可考者。併列于後。禮字志古者王畿千里。公侯之國七百里。體國經野。以爲民極。秦漢之制。郡國以城池爲上。而戶口次之。阡陌又次之。唐史臣志地理。敘漢制。述戶口。及四境所至。此書之法也。聖朝以路統郡。以郡統縣。以縣統鄉。以鄉統里。鎮寨皆隸焉。郡之治曰城。縣之治曰郭。郭者不城之謂也。自天子以至郡縣守令。其居皆曰衙。所以聽訟治事於其所者也。宮室於是乎列焉。建昌自漢潁陰侯立。南城縣至南唐。陞曰建武軍。開寶八年。改曰建昌。繇淳化至紹興。以南豐來屬。又析爲

新城廣昌。領縣凡四。而治南城。凡郡之境東西二百三十有九里。南北四百三十里。至東京三千五百里。至行在所一千二百三十里。其東則至邵武軍界一百三十五里。以杉嶺分水爲界。自界首至邵武軍一百三十九里。其西則至撫州界五十里。以磁龜山分水爲界。自界首至撫州一百七十里。其南則至贛州界三百七十里。以脩嶺爲界。自界首至贛州五百十里。其北則至撫州界四十五里。以界山爲界。自界首至撫州七十五里。其東南則至邵武軍界二百里。以百丈嶺爲界。自界首至邵武軍三百五十里。其西南則至贛州界三百七十里。以梅嶺山爲界。自界首至贛州四百四十里。其東北則至饒州界一百三十里。以出雲山分水爲界。自界首至饒州五百九十里。其西北則至撫州界五十里。以茨龜嶺分水爲界。自界首至撫州一百九十里。初漢立南城縣城隅之制。未聞也。至唐僖宗乾符中。汝南公鎮南城。有功還南康太守。將行召諸將示規模。均版築。始作羅城。周十有三里。廣一丈有六尺。高二雉。爲露屋千一百三十七楹。敵樓三十二所。東西爲八門。南北爲二門。開寶二年。南唐命園苑副使李崇贍爲建武軍制置公事。崇贍乃於羅城之內。增築制院城百六十丈。作門樓四所。所三楹。高二丈三尺。東曰來遠。以其通建饒泉州之道也。西曰永豐。南

日祈仙。以其通麻姑山之道也。北曰朝天。以其通京師之道也。景德元年詔下少府以金鉅一。戰十來賜。郡治稍稍備焉。其後城益墮圯。非王公設險守其國之義也。元豐中。羣盜廖恩據邵武爲亂。太守鄭俊珪謂舊城不可以備不虞。乃建言于朝廷。請新城築。詔從之。命有司給其費。更闢西隅之地。擇其壘塹者作新城。周九里三十步。昔周官匠人營國方九里。以宮隅之制爲諸侯之城制。皆九里也。然則斯之爲城。其諸成周之制乎。雉堞樓櫓皆撤而新之。爲禦頭二千三百三十。敵樓四十有五。馬面二十有三。東隅之制。甃以石。西南北則甃以磚。率一面壯而三面弱。爲門十。東曰太平。曰安濟。曰合江。謂南豐廣昌新城之水。與盱江合於此也。曰天酒。舊曰行春。元祐癸酉。甘露降于門之界山。因改曰天酒。福建之通道也。凡四。西曰洪泉。舊曰永豐。又曰山光。治平三年。郡守黃侯師道改紅泉。取謝靈運詩。石磴瀉紅泉之句。今改紅曰洪。曰青暉。凡二。南曰祈仙。趙麻姑山者。由是門而出。故曰祈仙。今侍郎曾公穎茂書扁。曰膏露。景祐丙子。甘露降于門之松。因以名門。凡二。北曰朝天。入行在所之通道也。後改曰朝京。今復舊名。曰朝天。侍郎曾公穎茂書扁。曰盱江。舊曰浮術。元豐中。太守陳侯輝題詩壽昌寺碧溪軒。詩云。蕭疎華薄隱山村。清淺浮術帶郭門。竹倚欄干。

水邊寺。興來題作碧溪軒。後改今名。凡二。初南城舊城。去今城二里。跨盱水而爲之。至是載築。乃徹東而展西。故東界盱水爲池。以威其險固。而闢洪泉門之外。居民數百戶入于城。故西池地卑。皆昔門外之民田也。建炎元年。金虜入我南昌。我師失利。長驅而來。江西諸郡懼無能禦之者。獨建昌城。虜不能破。苗傳劉正彥叛。頓兵城下。十餘日。攻弗克。乃遁去。紹興元年。虔寇李崇仁率其旅萬餘人來圍城。居數日。知不可破。又引去。其城壁堅。頗有如此者。故建昌之城。爲江西諸郡最。二十七年。太守胡侯舜舉始再葺之。由紹興迄寶祐六年。凡一百載。門有樓者。將仆焉。有壁者。多隳焉。其年冬十一月。壘乃更葺治城門。作新南門。明年改元開慶。築城一百五十餘丈。周九里。皆補完之。泐城皆置樓櫓。敵樓禦頭爲之一新。通判軍事馮侯夢得爲之記。曰。盱治豫章之南曰南城。漢以後築削莫詳。唐乾符汝南公作羅城。周回一十三里。以其地控閩粵孔道。爲江右第一藩屏。然郡猶未建。麻姑。鳳崗。蛇蟠之氣。至我朝浸盛。開寶升爲建武。太平興國易爲建昌。元豐間。鄭公琰爲九里三十步城。正合有周以宮隅之制。爲諸侯之城制也。紹興胡公舜舉再葺。迄寶祐戊午。一百有六年。日引月長。積頽宿朽。消息因革之會。天必有人物以擬之。是年夏。盜發南豐。至秋。猶梗。聖天

子以爲憂。環視在朝。思得有惠氣威風者鎮撫焉。今太守曾公以刑部郎官當其選。始至。不鄙夷其民。布宣天子德意。欲與並生。一以寬大從事。望竹龍蛇。必不得已。哀旅入阻。姑熾其首惡以徇。餘則盡放爲農民。按堵如故。而境內大治。古者諸侯守在四隣。其次守在四境。今四境寧一。左餐右粥。童兒踊躍歡呀。無內憂外懼。固異乎囊瓦之城郢也。我是以有城門之役。月令以冬月垺城郭。修鍵閉。凡從時啓閉。以治其弊。以待開閉之急。土功法也。我是以有季秋之役。涉冬歷夏。綢繆次第。越四月雨潦生如數。孳蠶。不沒僅三四版。齧斷邊際凡百餘丈。介人維藩。母婢城壞。雨畢而除道。清風至而脩郭郭。此先王之教也。我是以有今秋之役。是役也。不亟不徐。各以敘舉。雉堞樓櫓。環植周匝。棧店瓦甍。黝堊丹漆。蓋視昔衆壯。祈仙門樓舊。偪下卑傑。弗稱嚮明之義。乃盡撤而新。高培三尺。袤過之。漫迴高啄。傑出九列。與臯門相先面離。始於體爲愜。嘗試登眺。江山之鬱盤。雲煙之飛薄。沙石細繡。覽不盈掌。摩壘而上。偉觀。亦被文績。及是百堵又興。用層石二千七十丈。軌甃二十萬二十有奇。隄陜登登。而缺者始完。匠則傭工。夫則鳩兵。顧未用錢。以省緡計者二萬。米以石計者四百。傳曰。知所先後。則近道矣。君子入人之國。每從官室臺觀橋梁之間。以觀政。况設險以守。